

■ CONVIVENZA

Geniturs, vus dumagnais quai!

DA FADRINA HOFMANN*

Temp da stad signifitga en nossa famiglia era temp dals champs dal WWF. Per sclerir malencletgas gist al cumenzament: Na, jau na tramet betg mes uffants a champs per avair mes paus durant las lungas vacanzas da stad. Mes uffants èn fans dals champs dal WWF. Durant quella emna vivan els en la natira en in ambient d'aventura e libertad. Els emprendan d'enconuscher auters uffants da tut la Svizra e fan amicizias che tegnan per part fin l'auter onn, fin tar la proxima stagiun da champs.

Ils champs dal WWF èn fitg dumandads. La data d'annunzia è notada tar nus gia l'entschatta da l'onn per betg manchentar la schanza da pudair prender part. Savens èn ils champs numnadain cumplets gia suentar l'emprima ura. Daco quai? Ils curs èn bain organisads, ils manaders èn scolads e lessigs, il program dals singuls champs è attractiv: champ da chamonas sin plantas, champ da tipi, champ da detectiv, champ da canu, champ da sfunsar, champ da rampignas etc. Cun leger questas purschidas survegn perfin jau quaida dad esser puspè uffant. E lura èn ils champs pajabels. I dat schizunt duas categori-



as – ina per geniturs che gudognan dapli e l'autra per quels cun in budget pli stretg.

Normalmain èn las infurmaziuns avant il champ pragmaticas: lieu, urari, glista da pachetar, datas da contact. Questa giada hai jau survegnì per in champ set fepls cun infurmaziuns. Set!

Tge scriv'ins sin set paginas per preparar uffants sin in champ? Jau hai cumenzà a leger e chapì spert ch'i na va betg per ils uffants, mabain per il cumportament dals geniturs. Sut il punct «telefon» statti scrit: «Ils uffants na dastgan betg prender cun els natels. Per cas urgents avain nus in natel.» Ok, na pertutga betg nus. Mes uffants na possedan betg natels ed jau na vegniss betg sin l'idea da telefonar mintga saira per dir buna notg ad els. Proxim punct: «visitaders». «Nus supplitgain da betg visitar nus durant il champ.

Visitas pon chaschunar encreschadetgna e disturbar las activitads dal champ.» Em, tgi va a seccar ses uffants durant in champ? Il tema «encreschadetgna» ha dal rest schizunt in'atgna rubrica. «Voss uffant sto sa preparar dad esser in'emna senza geniturs. Quai vala era per Vus. Hajas confidenza che Voss uffant è capabel da far quai e n'al empermettai betg da vegnir immediat per el.» Quai na ma vegniss gnanc endament! Mo la meglra frasa vegn anc: «Sche Vus avais fadia da laschar ir Voss uffant per in'emna, na mussai quai betg memia fitg. L'uffant pudess survegnir nauscha conscienza da betg esser tar Vus.» Jau sun anc adina surstada da questa frasa. Ed in zic schoccada ch'in team da manaders cun blera experientscha ha entant da scriver in tal manual per preparar geniturs da laschar ir lur uffants ad in champ che dura tschintg (!) dis.

Sun jau ina nauscha mamma, sche jau accumpogn mes uffants senza crisa e nauscha conscienza al lieu da champ, dun in bitsch ed ina branclada e giavisch ina bell'emna? Quella han els numnadain segir – e quai als cuesch jau da cor.

*Fadrina Hofmann è redactura tar la «Südstschweiz» e viva cun sia famiglia a Scuol.